

ՊԱՊՆ ՈՒ ԹՌՈՒԾ

(իդիլիա)

Եփրեմ պապը շատ ծեր էր:

Վաղուց նրա աչքերը չեին տեսնում, ականջները ծանր էին լսում, իսկ գլուխը շարունակ դողում էր հասած արևածաղկի պես: Դողում էին և նրա սառը, չոր ձեռները. այնպես որ, եթիւնա թանով ապուր էր ուտում կամ շորվա, կերակուրը միշտ կարելթում էր նրա սպիտակ, մի քիչ էլ կանաչած միրուիք վրա:

Բացի դրանից, Եփրեմ պապը չէր կարողանում երկար ման գալ, հեռու տեղ չէր գնում և միայն արև օրերին, եթիւն սիրուն ուզում էր զբոսնել տան առաջի պարտիզում, կանչում էր թռոանը՝ Աստղիկին, և նրա առաջնորդությամբ, ձեռնափայտը ձեռին, կամաց-կամաց ման էր գալիս ծառերի տակ: Հետո Եփրեմ պապի ատամներից շատերը թափվել էին, դրա համար էլ ոչ միս էր կարողանում ուտել, ոչ չոր հաց:

Շատ ծեր էր Եփրեմ պապը: Տանը նրան այնքան էլ չեին սիրում և ամեն բան չեին տալիս ուտելու: Բայց նա սիրում էր ամենքին, և ամենից շատ փոքրիկ Աստղիկին. պատմում էր նրան հերիաթներ, առակներ, պատմում էր ուրիշ տղաների, աղջիկների մասին և այն մասին, թե ինչո՞ւ են ընկնում աստղերը երկնքից: Երբեմն կոպեկներ էր նվիրում նրան, որ կոնֆետ առնի... Եվ դրա համար Աստղիկը պապին շատ էր սիրում, ամեն անգամ բռնում էր պապի ձեռից և առաջն ընկած ման ածում ծառերի արանքում ու բացատրում, թե որ ծառը որքան է բռնել, և թե ինչպես է ծաղկել մասրի թուփը... Բայց Աստղիկը շատ էր ափսոսում, որ պապը չի տեսնում այդ բռլորը, և որովհետև պապը չէր տեսնում, Աստղիկը խղճում էր նրան և ավելի սիրում:

Մի բան սակայն դուր չէր գալիս Աստղիկին, այն, որ պապը

հիվանդանում էր շուտ-շուտ:

Այժմ էլ՝ երեք շաբաթ էր ահա պապը հիվանդ էր: Երբ նա հազում էր, Աստղիկին թվում էր, թե չոր տերեւներ են խշխաշում նրա կրծքի տակ, իսկ քնած տեղը այնպես է խոխռացնում, մեկը կարծես խեղդում էր նրան... Քանի օր էր պապն ուզում էր դուրս գալ արևի տակ զբոսնելու, բայց տատը չէր թողնում. ասում էր՝ կմրսի... Եվ Աստղիկը զարմանում էր տատի վրա, թե ինչո՞ւ է նա այդպես անխիղճ մերժում պապին: Ինչ կա որ, – մտածում էր նա, – թո՞ղ պապը դուրս գա, ելի տուն կգա... Բայց տատը և մայրիկը չէին թողնում: Եվ քանի նրանք չէին թողնում, պապն ավելի էր ցանկանում դուրս գալ...

Եվ ահա մի օր պապն անսպասելի վեր կացավ անկորոնից: Աստղիկն այդ օրը շատ լավ է հիշում: – Կիրակի էր. տատն ու մայրիկը գնացել էին ժամ, իսկ հայրիկը քաղաքումն էր: Երբ ինքը՝ Աստղիկը, փողոցից եկավ տուն, տեսավ պապը նստել է անկորոնում և ձեռքերով բան է փնտրում կողքին:

– Ի՞նչ ես ուզում, պապի, – հարցրեց Աստղիկը:

– Շորերս, – ասաց պապը դողալով:

Աստղիկը տվեց նրան կապան, չուխան, ոտնամանները և գդակը: Պապը դողդողալով հագնվեց և փայտը ձեռին դուրս եկավ պատշգամ ու նստեց այնտեղ՝ թախտի վրա, արևի դիմաց:

Այդ օրը պապի դեմքը շատ տարօրինակ էր: Աստղիկը նայում էր նրան և զարմանում, թե ինչո՞ւ այդպես մտամոլոր է պապը և ինչի՞ է ականջ դնում նա:

Պապն իսկապես ինչ-որ բանի ականջ էր դնում. գլուխը բարձր բռնած, աչքերը խուփ, նա կարծես կամենում էր լսել, թե ինչ է կատարվում գյուղում և գյուղից դուրս... Քանի ժամանակ էր դուրս չէր եկել տնից և դրա համար, յորը շունչ քաշելով, ուզում էր լսել կարծես դրսի կյանքը...Մի

քանի տարվա կուրությունը սրել էր նրա լսողությունը, ուստի և նա պարզ լսում էր մեղուների երգը օդի մեջ, բարդիների տերեւների ուրախ ծճքոցը և երեխաների զվարք աղմուկը մի հեռավոր տան բակից: Նրա ականջին էր հասնում և եկեղեցու տոնական զանգահարությունը, որը կարծես թրթում, խաղում էր օդի մեջ, և, շունչը կտրած, ընկնում գետին:

Զանգերի դողանջը Եփրեմ պապի հոգում զարթեցնում էր անցած-գնացած հուշեր, և նա իրեն տեսնում էր երեխա, որ Զատկին հոր հետ գնում էր եկեղեցի, ու զանգերը դողանջում էին այդպես հանգիստ ու միալար... Հետո նա իրեն տեսնում էր ջահել ու առողջ, որ նույնպես ջահել մի աղջկա հետ, թև-թևի տված պսակի է գնում, ու զանգերն էլ դողանջում էին այդպես թրթալով... Վերջապես, նա տեսնում էր իրեն հասակն առած տղամարդ, որ գերանդին ձեռքին խոտ էր հնձում դաշտի մեջ... Զնզում էր գերանդին, լորերը թռչում էին խոտի միջից, խոտը լաս-լաս դարսվում էր շարքով և այսօրվա պես դարձյալ դողանջում էին ժամի զանգերը...

Այս բոլորը հիշելով՝ Եփրեմ պապը հանկարծ զգաց հնձած խոտի հոտ և, բերանը բանալով, խորը շունչ քաշեց:

Աստղիկը, որ ամբողջ ժամանակ նայում էր հիվանդ պապին, հանկարծ զարմացավ, տեսնելով պապի դեմքը պայծառացած:

Պապը նորից խորը, երկար շունչ քաշեց:

- Աստղիկ:

- Ի՞նչ է, պապի:

- Ինձ տար բաղը:

- Բա որ մրսեն, պապի,- ասաց Աստղիկը, տարակուսանքով նայելով պապի կույր աչքերին:

- Չեմ մրսի, աղջիկս, գնանք...

Եվ պապ ու թռո ձեռք-ձեռքի տված մտան պարտեզ:

ծերունին, ձեռքը թոռանը տված, քայլում էր նրա ետևից և հարցնում, թե ինչպես են ծառերը, բոլորն էլ ծաղկել են արդյոր, ծաղիկները թափվել են, թե ոչ:

- Թափվել են, պապի, թափվել են,- պատասխանեց Աստղիկը:

- Պտուղներ երևում են ծառերի վրա:

- Այո, պապի, շատ...

- Եղ լավ է,- ասաց պապը,- էղ լավ է:

Խոսելով հասան փորդիկ պարտեզի ծայրը, որտեղից մի փորդիկ դռնակ էր բացվում փողոցի վրա: Պապն այդտեղ կանգ առավ և նորից շունչ քաշեց:

- Գնանք տուն, պապի,- ասաց Աստղիկը.- Կմրսես, տատը կրարկանա...

- Չէ, բալիկս, չեմ մրսի,- հանգստացրեց պապը և շարունակեց շունչ քաշել:

Մի փոքր այսպես կանգնելուց հետո պապը հարցրեց.

- Հանդն էստեղից մոտիկ է, չէ, Աստղիկ:

- Հա, պապի, իհարկե, մոտիկ է:

- Դե որ մոտիկ է, աղջիկս,- ասաց պապը,- ինձ տար հանդը: Դու էլ քեզ համար ծաղիկ կքաղես:

Աստղիկն ուրախացավ.

- Հա՛, պապի, Էնքան ծաղիկ կա հանդում...

Մի քանի բոպե անց արդեն գյուղացիները զարմանքով տեսան իրանց բակերից, թե ինչպես իիվանդ Եփրեմ պապը թոռան ձեռից բռնած գնում էր դեպի դաշտը: Նրանք գնում էին դաշտ և մոռացել էին, որ տանը մարդ չկա, և դռները բաց են հավերի ու շների առջև:

Փոքր հետո նրանք դուրս եկան դաշտը և երկար ժամանակ գնում էին խոտերի միջով: Պապը քայլում էր կռացած և հևում ամեն մի քայլ անելիս, քայց կարծես չէր հոգնում.

իսկ Աստղիկը պապի ձեռք բռնած առաջնորդում էր նրան և շարունակ խոսում. «Պապի, դեսն արի», «Պապի, առաջիդ քար կա», «Պապի, լոր տո՛ր...»: Եվ ծեր պապը թոռան ձայնին հնագանդ, կատարում էր նրա բոլոր պահանջները. լոր էր տալիս ջրի վրայից, թեքվում էր այն կողմը, ուր քաշում էր իրեն փորբիկ աղջիկը:

Բավական տեղ գնալով՝ պապը կանգնեց, շունչ քաշեց բարձրահին ու հարցրեց Աստղիկին, թե ի՞նչ տեղ են գտնվում իրենք:

- Լավ տեղ ենք, պապի,- պատասխանեց Աստղիկը: - Էնքան ծաղիկ կա...

Պապը շունչ քաշեց դարձյալ և հարցրեց.

- Աստառը մոտիկ է, համ...

- Հա, պապի, հրես մոտիկ: Դու տեսնո՞ւմ ես որ...

Պապը, առանց պատասխանելու, կույր աչքերը բարձրացրեց և ականջ դրեց: Այս անգամ նա ուզում էր լսել անտառի ձայնը: Եվ ահա պարզ նրա ականջին էր հասնում հինավորց անտառի խշշողը, որ նման էր գետի տևական շառաչի: Աստառը խշշում էր այնպես, կարծես բոլոր ծառերը միասին երգ էին ասում: Ինչ լավ է խշշում անտառը,- մտածեց պապը: Այդ խշշողը նույնն էր, ինչ որ շատ-շատ տարիներ առաջ: Այդպես էր խշշում նա, երբ ինքը երիտասարդ էր. այդպես էր խշշում մերին, երբ նա հասակն առած տղամարդ էր... Այդ խշշողը նույնն է, առաջվանը. նույնը կլինի և միշտ...

Ու Եփրեմ պապը տխուր հառաջանրով նստեց կանաչների վրա հանգստանալու, իսկ Աստղիկն սկսեց ծաղիկներ քաղել և վազել թիթեռների ետևից:

Նստած տեղը, բոլոր ժամանակ, Եփրեմ պապը շարունակում էր ականջ դնել:

Այժմ անտառի խշշոցի հետ նրա ականջին էր հասնում

առվի քչքոցը... Նա ձանաշում էր այդ առուն, հնծի ժամանակ քանի անգամ էր հաց կերել նրա մոտ... Առվի քչքոցի հետ Եփրեմ պապի ականջին էին հասնում և թռչունների երգը-այդ արտույտներն էին երգում- և խոտերի շրջունը, և հովից օրորվող թփերի շշունջը, իսկ հեռվից գալիս էր դարձյալ Եկեղեցու զանգերի ձայնը ու խառնվում անտարի խշշոցին:

Ինչ լավ է խշում անտառը...

Այսպես էր մտածում պապն իր սրտի խորքում, և նրա շրթունքները դողում էին հուզմունքից. ուզում էր աղոթել, բայց միտքն աղոթքի խոսքեր չէին գալիս... Մի փոքր էլ ականջ դնելով այդ ծանոթ, հարազատ ձայներին, պապը հանկարծ կրացավ և գլուխը խոնարհեց գետնին...

Երկար համբուրում էր նա կանաչով ծածկված հողը և անզուսպ արցունքներն առատորեն թափվում էին նրա աչքերից... Մի փոքր էլ, մի փոքր էլ, և նա ուժասպառ ընկավ կանաչների վրա...

Քիչ հետո, երբ Աստղիկը ծաղիկները գրկած վերադարձավ պապի մոտ, զարմացավ, որ պապը պառկել է...

«Պապն ինչո՞ւ է քնել Էսպես», - մտածեց նա և ձայն տվեց:

Բայց պապը նրան չպատասխանեց:

Այդ ժամանակ Աստղիկն ավելի մոտեցավ նրան և շարժեց ձեռը.

- Պապի, այ պապի,- կրկնում էր ձեռքը քսելով պապի երեսին, գլխին:- Վեր կաց, գնանք... Դե, պապի, վեր կաց, տատը կբարկանա...

Պապը դարձյալ չէր զարթնում: Իսկ Աստղիկը շարունակում էր շարժել նրա ձեռը, գլուխը. աղերսում էր, որ զարթնի: Բայց պապը ժաժ չէր գալիս...

Այդ տեսնելով, վերջապես, Աստղիկը որոշեց և վազեց տուն՝ հայտնելու, որ պապը քնել է դաշտում ու չի զարթնում...

Բայց պապը չէր քնել...

Գնացին տեսան պապը մեռել էր դաշտում:

Երբ Աստղիկն այդ իմացավ, նա չէր կարողանում հավատալ, որ պապը մեռած լինի. նա չէր հավատում և նրան, թե պապին կտանեն իրենց տնից, և նա էլ ետ չի գա...

«Հապա էլ ով կպառկի նրա անկողնում,- մտածում էր նա,- ով կհագնի նրա չուխան...»:

Եվ երբ մյուս օրը տերտերները պապին տարան ժամ, Աստղիկն սպասում էր, թե պապը կվերադառնա. բայց մութն էլ ընկավ, նա չեկավ... Իսկ երբ տան դռները փակեցին, որ ընեն, Աստղիկը սաստիկ տիսրեց ու լաց եղավ վերմակի տակ:

Նա լաց էր լինում ու մտածում, թե ինչո՞ւ տան դռները փակեցին, չէ՞ որ պապը կարող է գալ. գուցե հենց հիմա էլ եկել ու կանգնել է դռան առաջ...

Լաց լինելով մտածում էր, թե ով պետք է այստեղ ման ածի պապին, չէ՞ որ նա չի տեսնում, կարող է քարի դեմ առնել կամ ոտք ջուրը գցել...

- Ա՞խ, տեսնես կլինի մեկը,-մտածում էր Աստղիկը,- մի քարի տղա կամ մի քարի աղջիկ, որ խեղճ պապին ման ածի այստեղ...

1916